

晚

翠

軒

集



嗚呼噉谷之詩至是凡三墨木矣自戊戌變政鉤黨禍  
作昔之密邇噉谷者多以藏其文字爲危不匿則棄惟  
恐不盡當噉谷被逮時聞其中笥尙有硃書票擬暨與  
德宗造膝問對有如家人父子之言者亦皆散失不可  
得見越數歲大舅沈公濤園以京兆尹出而提刑粵東  
予自江甯來別諸滬濱忽於廣大海舶行李中見一篋  
衍熟視之知爲噉谷故物不鑰而啓則晚翠軒之詩與  
孟雅夫人崦樓遺稿在焉旣恫且喜遂請以校刊自任  
歲乙己居崇川事簡多暇爲之排比付印一千部分貽  
知好轉瞬輒罄厥後爲涵芬樓收入戊戌六君子集中

寢以風行然私念礪谷平時書札墨瀋具在縱論時事  
臧否人物有爲一代興亡所繫者宜與天下後世以共  
見於是復與林丈筱輪鄭丈叔昭表弟沈劍知從事搜  
集重爲晚翠軒補遺詩十三首崦樓補遺詩十四首並  
檢濤園馮庵二長者題記輯爲一卷益以礪谷手簡及  
其應試文字附卷末嗟乎是區區者假令當日不邂逅  
於舟次則礪谷與孟雅夫人之餘緒足以傳後而不朽  
者或將展轉散落豈不更可痛耶礪谷論詩雖以澀體  
爲主然其宗旨在乎能驛衆派不欲妄生分別爲道之  
大於此可見且其詩精妍博瞻雖從後山涪翁入手漸

亦浸淫蟬蛻於昌黎臨川之間偶爲晚唐自謂不讓韓  
致光其自命爲何如者至若五言古七言絕則無一不  
深得宛陵誠齋之家法授命之日春秋纔二十有四耳  
求其造詣於古人視王廣陵猶有過無不及特世之議  
噉谷者往往病其躁進不知士丁未造有志康濟不能  
不自奮於功名晚清士夫闢茸闇懦隨波進退而反譏  
人之勇於赴事爲熱中此風氣所以不振清社之所由  
屋也至於黨籍之說亦未可盡信觀噉谷丁酉十一月  
與予書猶有長素適來日有是非欲避未能之語是其  
意非真欲阿附南海者然君臣際遇會於一朝有不期

然而然而不可以無死者其視亡命苟免不恥事讎之  
流奚啻霄壤顧可僅僅以黨人目之耶今者瞰谷往矣  
回憶戊戌冬義僕朱德貴間關歸其喪囿車過城東門  
鄰舍兒爲之歌曰斷頭旭血化碧日未落河水涸嗚呼  
是何聲也吾不忍思之矣歲次丙子十二月後死友閩

縣李宣龔謹序

閩侯縣志列傳

林旭字暉谷號晚翠祖福祚傳在循吏父百敬邑諸生  
旭少孤從塾師學爲律賦出語驚其長老喜瀏覽羣書  
家貧閱市借人人見其強記樂與之同邑沈瑜慶者以  
道員需次江南省墓歸異其博瞻以愛女鵲妻之贅於  
金陵從遊武昌徧識一時所謂名流若陳寶箴三立父  
子梁鼎芬蒯光典屠寄之倫歲癸巳旋里爲邑諸生旋  
領鄉薦第一闡作傳誦天下年十有九耳入都知名士  
爭與交試禮部不售則發憤爲歌詩取路孟郊陳師道  
苦澀幽僻識者以爲孟夏行冬令非所宜未幾中日構

戰中國方大挫言變法者蠡起京師強學會興旭則入  
貲爲內閣中書與京僚張亨嘉等興閩學會王儀通張  
元濟等興通藝學堂戊戌康有爲梁啓超方上萬言書  
開保國會旭日奔走其閒既下第湖廣總督張之洞湖  
南巡撫陳寶箴皆欲致之而中朝方令京外官三品以  
上薦舉人才翰林學士王錫蕃奏薦旭召見特命與楊  
銳劉光第譚嗣同以四品卿銜充軍機章京參與新政  
日夜謀變更一切甚急欲盡斥耄老諸大臣舉用新進  
十日而難作矣初那拉太后雖歸政景帝而用榮祿爲  
北洋大臣某爲步軍統領兵權固在握也新進者亦知



無兵不能有爲則請景帝調用袁世凱軍謀未成而后  
聞之四章京就逮數日未具獄辭斬西市相傳旭獄中  
有絕句云青蒲飲泣知何補慷慨難酬國士恩欲爲君  
歌千里草本初健者莫輕言千里草指董福祥蓋少戇  
也死年二十有四無子有晚翠軒詩陳衍撰

晚翠軒集

侯官林旭瞰谷

龍王洞

去城四十里戴石若菑菑空青落眼中塵翳盪先澹欲  
近勢轉下漸陟路軻輻呀然數百尺金碧煙中嵌龍居  
洞裏潭激水洞上縈有如春雪融清茗樓頭擘吾欲尋  
其源但怖水色黝山深積噓吸形埒氣所感稍上有二  
洞松蔦蔽黠闇天光豁重昧風力集衆喊楚境清江流  
巫山白日晦南望見苗疆五色莎蘿毯歸來誇腰腳獨  
往負志膽丈人談龍德清味自淵潭弱年罕壯游如此

實未覽新詩誰先成巖松可用槩

題三游洞

閉門不看宜州山臨去還來訪窟顏聊欲向僧尋枕簟  
溪軒暫臥聽潺潺

還家題齋壁

嘉樹殖有譽故都望生喜行人四月至夏雨灑芳牕最  
念手移梅旁出芽如指海棠枝上蟲斑綠狀踈跂荀生  
不擇地廊墻石盡起治蕪理芳草坐定青襲几南鄰荔  
支熟高繖張紅紫筠籠亦相及饒眼慰無俚去年大雪  
寒實小酢如李

書聲諸弟好燈窗無隙地旋旋行復坐我自知何意登  
盤主簿果飽啖萬事置赤嵌客亦還五叔父自臺灣歸團團五  
日洎但言肥無加欣慰舉杯相少孤依大母西日追無  
驥夢歸見生存歡笑家人侍夢境不可尋歸日卻涕泗

再題

相去常悲天一涯如今可是到家時畏人客子成何著  
耐向閒庭數日思

寄梁節庵武昌

高言不止衆人心折楊皇芻易爲音我見斯人每有得  
可知語上資堪任眼中時賢願識少於水譬見瀟清深

先生偉節風天下求匹于古非于今寒泉舊井不自慚  
汲引後進猶鉤沈窺公性情實至厚憂時念友恆欽欽  
去年蘇州誅循吏王忍齋高臺流水朱絃暗我今師喪重  
繭赴服勤一念空差參感我遠行忘新歲招上湖樓邀  
客吟騁妍抽袂盈衆態游心竄句費幾斟北海酒尊誰  
擎舉潁川公子相追尋陳伯嚴明朝辭去船下水回看大  
別春陰陰武昌二度食魚美宿留桑下慚精謀微醕回  
衍聲病澈撞鐘試可繩題襟

宿張侯府幼蓮師在殯

巡視空堂閱月移依稀曾是別師時半年行役思心切

一慟空來侍疾遲，絕學千金成。豈見人生三釜泊，猶悲  
但憑雨夜彭城感。謂邵亭叔試爲探尋滿篋詩。

南關市口小寓

二月長安鍵戶眠，幾多情緒放還牽。甯知車馬喧喧度，  
只聽風光晚晚遷。白髮四娘閑自得，朱籠百舌巧誰憐。  
天桃穠李皆同院，寂寞無言伴惘然。

新濟輪船逢續九丈和予宿侯府詩感其辭尤哀  
更答之

先生髮白不鬢鬢，心緒千頭老弗戢。失第尙羞行卷謁，  
無官終被小兒慚。天涯旅食惟身賴，海上相逢各淚含。

我是哭師君悼友此情可許別人諳

閔月湖荷花同遊爲林昭通紹年

月湖六月南風吹紅裳翠蓋浮漣漪昔聞其語今見之  
眼前反覆人得知壯夫腰鑱方縱意漁父拏舟自垂淚  
哀哉斬艾不自保紛紛載去如束藁風水之說詎有憑  
邦人波靡誠可憎花神伉爽愬炎帝妖氣天閭反見擠  
蒼蒼豈必矜君子我懟禍端由自取中通外直得之性  
蒲稗雖多何足競一朝讒口巧中傷坐令喪氣及羣芳  
藏山居士倘見此爲爾痛哭摧肝腸

宜昌城南有漢景帝廟

城南漢景祠鬱鬱依大栗婆娑舞巴童迎神激清瑟普  
土皆王臣瘴陬猶薦苾惟王禘其祖禮先所自出

從王肅說

郡國奉禋祀我疑章武日孔明禮樂材斟酌得疏密儒  
生許孟輩會議想奮筆惜哉無史官憲章坐散逸不思  
此僅存取證諒難必

號亭戰後此地東屬或孫休廟歲久訛爲漢也

### 暑夜泛姜詩溪

清溪十里幾多盤收束將窮卻放寬山要攔人攔不住  
側身讓過乞人看

擊汰聲齊力未孱扁舟催進幾灣灣我們冠者偕童子  
只有篙師束手閒



大家莫把仙源說那有仙源到兩回昨日好山撐不近  
明宵須換小船來

橋柱孤栽細石平相將上去臥縱橫不防山賊防洋鬼  
犬吠兒啼鑼亂鳴

本來沙路有人行溪水長乾江水平過去中元游十日  
中秋毛水月空明

節庵來江南久不見作長句代簡并訊叔嶠三丈  
街頭大雪一尺餘相思不見不怨渠先生東門種茹蘆  
脩然不異山中居憂時百念弗一攄却緣病起心眼舒  
行將徙宅通明車載來家具一半書可許借讀資鈔胥

南村舍人復何如西山載酒甯忘諸

北行雜詩

楊村一夜雨張彎三尺泥向來戎馬迹能畏鷓鴣啼  
東風復北風廣野號衆竅豈無白日光吹土翳清晝  
屯幕臨官道柳陰臥橐駝莫將笳鼓競空唱天山歌  
客店騾馬滾公徒何振振皆言防帝畿那復愁行人  
絕似烏龍潭陂池相映帶可惜好西山蹉跎斜日外  
道旁千萬柳能作幾多春明歲還如此行人非去年  
叔嶠印伯居伏魔寺數往訪之

窗外丁香玉雪色窗下雨生坐太息可憐太息空爾爲

舍人縣令官秩卑朝出空遮御史車莫歸還草相公書  
宗廟神靈三百春卽今將相未無人言戰言守言遷都  
三十六策他則無深宮追念先朝痛根本關中敢輕動  
擲鼠忌器空持疑餒虎割肉有盡時書生不自有科第  
能爲國家作麼計東家翰林盡室避猶聞慷慨排和議  
約游西山會文學士宅聞和議成學士憤甚余輩  
亦罷去

都言踏破西山石踏破西山石都下有此語我望西山勢不行爭怪  
憂時文學士但看煙翠亦何情

旭莊四丈公事往漢口有詩留別

莫遣吟詩鼻易酸客懷好逐看江寬居人猶覺心情惡  
六月西風雨作寒

晴川虛閣記崢嶸未忘將軍醉客情謂常形翰軍門今已沒略述  
前游發長歎應知芳草繞堦生

月湖荷花千頃生摧殘人豈是無情憑君爲勘今年狀  
他日還書寄一聲

### 感秋

清晨負手行蟋蟀鳴我門因知秋氣厲感此悲流年病  
夫日掩戶一月不窺園頗聞梧桐樹飄葉聚其根歲寒  
皆黃落而汝胡爲先我將種長松不與時推遷小庭數

盆花青青亦堪憐但覺淒清意莫向西風前

病起漫書

耳目與口鼻不思何錄錄苟能得其養心亦卽快足四  
者彼何知惟心實有欲所以養心者必先此四族愚奢  
厚自奉反以滋垢黷一鳥能遺音豈必奏絲竹一花可  
慰眼豈必陳綺縠誦詩味芬芳聞香氣清淑領略信靡  
窮我亦我能惱

病後關門趣自深天明卽起似幽禽食單寂寞添鄉思  
詩句頽唐趁倦襟檢點舊書看復放商量佳客遣相尋  
更欣秋月光輝足不惜窺窗夜夜臨

效太夷丈

松生依澗谷上爲干霄枝搖落尙不與繁華豈嘗知

感事

昔人治國戒察察黷黷塞耳冕前旒聰明蔽近不蔽遠  
肘腋往往藏奸謀水清無魚信所鑒網漏吞舟亦可憂  
賢人君子常不悟一朝負敗爲身尤

八月十五夜呈陳馮庵

今宵月慰一年願滂沱漬作秋光曼中庭桂樹亦何有  
析格交橫雜藤蔓無言清影自徘徊便覺玉堦寒未遜  
幽居兀兀忘時日佳卽讀書飢呼飯偶然吟咏但自適

馮庵老人論契券清狂值得病魔訝稍稍去之不余恩  
感渠夜夜來窺尋爲洗從前幽獨恨應須一字論一縑  
始抵嬋娟價千萬老人老去詩律細漸有少年笑才鈍  
我今此事當推誰立待揮毫甯用異

索桂花家人不與

誠齋詩句要商量儘道春花豔未強誰識維摩病居士  
不應聞取木樨香

瓶裏花空意自存節庵懲恙手書煩誰人憐我雙眸倦  
推出天邊白玉盆

與方慕韓

我始就傳出君實連牆居同年一用。小共學兄弟如先生君長兄愛我常並譽太翁白髮健攜我坐牀數分甘預一割錦紳再拜趨不見八九載誰謂同州間樂羣日可數在遠跡愈疏言念小秦君欲從治漢書今我不強學殖落殆成擗見日撫手忉口呿窮須與聞君秋當婚孟姜瓊瓊瑤登高夥新詩緣情故自殊風流若司馬補厚子意有餘放衙撻佳語探懷出明珠浪浪身萬里藉問何止正

寄題宜昌姜孝巖濤園外舅所作亭子

夢見孝巖蘿樹青偃松聞已化龍形宜州近日添新語



一郡游人上沈亭

重九出游既夕泛舟秦淮見月

佳節心隨物色搖出門四望未蕭條  
新霜紅盡冶城樹商略獨游畏路遙

人閒別自有嬋娟平視誰曾見月圓  
與我共安喧裏寂更無人賞亦條然

病髮絲絲隨葉落客懷漠漠借船眠  
鏡中原著通明我多事看成徹兩邊

逃席

逃席原無仇餉情向來意興實縱橫  
登樓自借清宵賞

不飲甘當惡客名蟲穴書明驕月亮鳥搖林動誤風生  
歸途此物猶堪念塘水荒寒野蛤鳴

堂子巷鄭七文宅小樓

東山莫靄堆沈墨西崦殘霞畫赭黃併入小池兩邊色  
分明圖畫畫難詳

九月十六日雪和馮庵

玉琢參差銜瓦明風吹塊重墜還輕不逢閨歲交冬節  
若話家山感客情馮菴詩有紙  
薦風色語牆下空尊眠自冷堦前  
殘菊壓都傾道人縮手看難足卻笑冰寒鏤不成

是日寒甚

中庭滴瀝雨交并。虛室來風色更瑩。卻憶誰家樓上好  
稍晴。要看玉崢嶸。

鼻涕知寒拭更流。團蒲曲几道相謀。難從羔酒求風味  
空廢持螯數日游。

節庵送鍾山書院祭肉賦謝

無由陪祭從門生。逮賤分嘗感盛情。一一斯文斯道寄  
有神。尙冀錫聰明。

靈澤夫人廟

故國何人與奉匱。竹竿從此釣於淇。韋昭吳史應書卒  
不見春秋宋伯姬。

太夷丈屬和其移居詩逾歲乃呈一絕

窗前種竹經年活舍後栽花近水便占著青溪如谷口  
百般忙裏作神仙

張園梅花

張家園裏數株梅歲歲相逢總盛開花上盈盈歌一闋  
風前豔豔酒千杯芳波照影知誰見斜日攀條却獨來  
眼底風光渾不是一回思念一回灰

無題

海上今年二月寒出門何地有花看思先清曉車輪轉  
意共黃昏燭本闌世界愁風復愁雨肝脾爲苦亦爲酸

東隣巧笑頻相訝倚柱哀吟故未寬

申前意呈石遺

流水游龍去等閑同車惠我待君還王官行李愁奔命  
胡婦燕支笑破顏宿雨反風寒作雪高樓含霧遠如山  
縱然沾醉憂能入不及逃虛日掩關

虎邱道上

吳人豔說山塘好不到山塘恐受欺向日搜尋無一字  
却來此地得新詩

願使江濤蕩寇讎啾啾故鬼哭荒邱

治日本租界  
暴骨千萬

新愁

舊恨相隨續舉目眞看麋鹿遊

二月十八日讀史

韓誅彭醢瞻言漸東海蕭生致可憂但有太師馭邊手  
門生何術更吹求

寫經居士贈詩盛道閩派而病予爲澀體謂學蕪  
湖袁使君因答及之

夫子論詩笑口開叨逢目色却低回涪翁不忘絃歌旨  
杜老誰區排比才底用爲藩防楚舍更羞酌水溯強臺  
似聞辛苦賦顏恰要傍東家司寇來

往歲鄭太夷丈居江南督幕賦枇杷詩絕愛之頃  
來大通督銷局所見殊夥欲去乃題此

明季車集  
荒洲風物見枇杷青實茸茸指有加欲傍小軒題晚翠  
已成昨日憶天涯

馮庵先生日成數詩輒呼予視之

閉戶空參曹洞禪從人嗔勸樂吾便詩題滿眼渾無字  
那對先生萬斛泉

頃刻催成紙面花呬唔喚起筆間霞撚鬚自向鐙前讀  
想見潘郎果滿車

隨舟芍藥伴詩翁更盜醪醑陽虎東冷淡生涯入四箇  
誰家翠幕覆重重三詩均有本事

叩馮庵門就睡矣誦一律使予書之和作

詩翁不慕酒中僊貪把深杯取易眠燈下杜鵑對嬌絕  
梳中薜葉飲冷然是他魔著難成夢媿我牆窺但及肩  
說似誠齋吾亦允心頭約略識清妍

題陳公寬小照

紅袖滿樓同醉日要論僧舍讀書時相看一笑知身世  
煙柳斜陽景付誰

荷葉洲雜詩

雲繞青山山繞江一洲中著四淙淙登樓忽憶青龍閣  
宜昌鹽局臨清景原來亦有雙

新建

勸中丞  
方鐫

詞中唱賣鹽雕鐫荷葉我猶嫌只從和悅



渠儂語

土人音轉  
爲和悅

春盡潺潺不捲簾

來此未  
嘗見月

九華見說春茶盛新摘毛尖一日程慰我窗中吟望意  
風生兩脇卽飛行

依然天際識歸舟落日荒山柱礎稠足底江流似裙帶

何人朱字寫空侯

巖山磯有亭名識舟  
兵後改作題非其舊

將去大通久雨始晴治詩就畢

一春不恨不曾晴晴去荒洲作麼生今日肯晴甯有意

可知天也速人行

詩無數首卽言刪吟到三年豈便安早日何曾知句法

旁人謂不費心肝

君看象教但塗金法教誰知箇裏深我爲世尊還白淨  
何方能免一塵侵

舟中讀誠齋詩

裝中一卷荆溪集拂拭舩窗得暨披不道霞光侵漆几  
忽看赤鯉出清池

馮庵移居穿虹濱以詩賀之是日四月八也

碧雞光景日迷離白韃山梁翔集時桃印施門須溼字  
商量端合署鍾馗

薄薄猪肝要自供先生約法竈君從今朝有喜何人共  
酌酒西頭壽士龍石遺生日

法王降世恆星隱詩老移家氣象干添與今朝作故事  
可知位力一般般

客窗共咏枇杷樹風味依依故可思此後詩成馳急足  
便令辟重也嫌遲

馮庵三益里中徑无悶四條巷裏春定識寫經居士葉  
無窮詩句出清新

日本縣牋製畫殊有古意

擣繇爲質繭爲膚小景精工俗製無春淺桃花輕着粉  
江寒鳬影婉將雛法傳撮摭書原好字盛迦盧用自殊  
玩好故知能弱國從人畫革亦區區

自穿虹濱步歸王家庫書所見

歸路幢燈火始然長街過雨步輕便本來高柳黃塵地  
誤入桃花薄暝天鳴鏑場開承淺草留犁酒繞滴清泉  
獸旗飄颻知何世辟地還從受一塵

見月有感

一餉攪林聞浙瀝幾時瀉地踏晶寒指頭儘有千幢現  
雲裏惟將一鑑看地曠蛙聲來鼓吹池深墓影窟盤蟠  
太陰圓闕干渠事却笑盧仝淚不乾

雨夜醉歸

桃蹊無語葉如幃淞水東流翦不歸時世畫眉將半額

春寒呵手不成圍  
雨聲月色和同好  
馬足鐙光一併飛  
只合騰騰隨俗去  
休論西子與南威

懷仲奮

平生少交友  
仲奮實和唱  
久別雖無書  
夙意知不忘  
近聞廢蒙楚  
能復輕悼喪  
一年作客三  
四歸日暮  
高堂正爾望  
好學深思世  
所希蚤白已  
作星星樣  
年來萬事况  
違心難從問  
訊知何狀  
故山雨溼梅  
子熟憶否  
同看三峽漲  
昏因洽比得  
相從年家君  
是丈人行  
豈惟共學事  
文句更期適  
道正蘄向始  
君嘿嘿尙自  
謙感我殷殷  
不多讓深於  
訓詁作詞章  
孫孔本朝相  
頡頏篋中纂  
述今

當成只恐惡懷多廢放懷君作詩不寄君君見詩時增  
愴悵

所居草樹特盛

寄居嘉蔭託清圓商略無妨過夏天日出先明千葉露  
雨餘盡綠四圍煙山中只異鱗鱗全鼻際常聞栩栩鮮  
西學人所也 也比城南老居士閉門抱甕樂真全  
謂養氣也

相知行

相如昔日家成都四壁獨具長物無若非文君夜奔往  
聘錢難借何論逋鬱林女兒生照井青州公子識光景  
明珠百斛不與寶更退翹風作房老書生窮薄不足道

化爲鵲鳩啼芳草黃金在手失娉婷人生幾見多財好  
樂莫樂兮新相知將新比故猶有疑佳人一去豈再得  
只有延年語可悲

和人觀張園車馬

春去初添車馬狂慢纓御者意揚揚看街樓閣人垂手  
過眼雲煙鑑眩光趑趑散眠芳草地盈盈歸去牡丹坊  
難知此日園林價莫轉詩人錦繡腸

雨至

樹頂黑雲舒忽白斜光一片化滄濛窗閒客子卷書帙  
江上漁翁收釣筒

初見白煙流碧海俄還青葉繞紅牆雷霆剩遣蚊虻寂  
高枕眠過三日涼

偶得舊紙扇是往年柳屏義門所寫題以寄之

章臺拊馬當時物不逐春歸柳色空我友別來詩句舊  
三年懷袖過秋風

蝶二首

暫借茅亭坐夕暉被涯芳草水深圍花香處處兀無見  
栩栩何來此地飛

輕衫自愛樓頭立團扇頻頻女手揮車馬沸天燈勝晝  
閒閒一蝶傍牆飛



絕句三首

深藏歌舞翠簾垂耳熟風柔遣得知不望一斑疏處見  
隄防捉去罰吟詩

總被春歸愁勿聊對他春鳥厭厭曉曉情知吉語來何暮  
除爲填成萬里橋

大謝風流舉世傳胡牀素髻坐脩然看渠婉婉名駒子  
已覺駸駸老輩前

述哀

故觀察東湖  
王公定安

海風吹夏寒閉戶聽瑟颺哀從靜中生有若井泉溢斯  
人王夫子白日謝昭質哭寢忽幾時餘愴託簡畢昔歲

客江甯閒居重九日高軒隆隆過文場之魁率幼卑不敢見僮僕笑嘖嘖敦敦拈髯髭風雅意無匹揚摧極古今頭紛而緒密百川秋灌河乃覩會歸一海內寶宋齋牙籤三萬帙招我坐其中竟日常折卽巍巍文正公遺教爲稱述宗法司馬遷文章綜事實學詩杜與韓萬化本六律私淑媿非才再拜心空拙別公夷陵去千里風吹麝有美見山川崱峩而澍汨行公釣游處作詩附歸駟中閒再見公鍾山雪花融客坐見小同髭髥垂如茁試文中學官鍾愛時加膝顧言此兒異老夫讓跨軼子昔年如渠定是更秀出昨日得佳章開緘怵復啞子自

求莊達我已任藍華蹉跎兩儀遷悽愴九言卒疚心音  
問寥極目邱墳窳平生良史才敘述紛四七古人貴報  
恩蔡邕豈直筆國家權煮海爲治至纖悉歷載有成書  
辛苦見次比義與桓生殊頗亦言民疾公卿雖不用退  
省初無失化行潁水清徹珮如私恤空舲有夜猿淚盡  
血泔泔

得三叔父書

叔父歸鄉里我心日悠悠昨者寄書至惟其疾之憂跪  
讀三四遍涕下不能收出門已三載倦翮樂暫休諸弟  
肯讀書但苦飢腸憊選官緣資格爭席傷鼃蠅還如稻

梁雁因風俟九秋衣食非粗足安作馬少游吾黨二三  
子進取力所勦書問久不具愛我猶怨慙懷哉劉牢之  
孝儀舅少孤寔命猶扶將偕我母門戶枝相膠讀書成後

進雲路視何瞻操心病咯血新來可瘡不吾師楊夫子  
用霧好學罕比儔漢書寫百過記誦如水流窮經志不墮  
皓首誰見訓小夫擁皋比妄用相踉蹌近來鄉校議忼  
若寐而瞰遠惟循循意欲見皆何繇南齋千竿竹風來  
聲颼颼上有百好鳥終日鳴啾啾去年防火道斬伐若  
去讎好鳥四飛去巡視安所投向來憐惜之聞此心內  
抽今年新筍長庶幾復有鳩因聲問此君歲寒盟可求

柳屏在甯波度其必過此得書已歸太倉矣因寄  
隨俗蹉跎會面違坐才奔走寄聲稀徒勞設伏遮歸路  
不覺平明敵潰圍  
加減多君問短長閒人心力倦論量要知縣巷臙脂色  
便是江南時世妝

柳屏問刻詩

自憐蚓語與蟬嘶百首煩人爲整齊不畏仙官來攝取  
夜深疑有樹精啼

清風明月無窮物臨水登山自得之萬里更堪經九折  
王良獨有轡如絲

攜詩視石遺出門爲風吹去屬有所思竟勿覺也  
運乖只恐溝渠汚思至須防坑谷傷緣汝癡獸卻無益  
不教建鼓覓逋亡

所居往高昌廟路上作

坡陀迴伏車輪側田水清深樹色藍忽憶天津二月道  
說他風景似江南

張園呈石遺卽效其體

深篁傍水搖蛛網三兩拒霜照眼明窮巷幽姿端可比  
秋風斜日若爲情殘荷昔日看猶在遠客臨行思自生  
且欲留詩當報禮仁人一序敵連城

和友人韻

錦車使者歸來晚  
霧閣雲窗又起家  
楚岫夢回洵美矣  
漢宮望久詎非邪  
君王自失河南地  
顏色能驕西海花  
生不逢時尙傾國  
也將續命託琵琶

海西菴東偏小院  
梁伯烈榜曰藏山  
伯烈二年不歸矣

端坐能窮萬物妍  
江波日日看洄漩  
信知文室維摩詰  
得傍瓜廬焦孝然  
賢守早亡惟遠客  
山僧深閉自安眠  
枇杷千樹眞過我  
來值繁霜十月天

先生許爲晚翠軒  
作記言焦山多枇

杷樹當以軒屬我

露筋祠

篝火深宵叩廟門，拜瞻環佩自然尊。詩成不得誇神韻，

只好從人笑鈍根。

漁洋斥後山爲鈍根

清口舟中

晴日張帆意自新，雨中牽埭力猶辛。垂楊不斷懷終古，

白鳥相煩謝有神。土隴時逢燒蟹地，客嘲真作鯢煙人。

騰騰枉自超江海，未識風輪勝火輪。

有錢難買鯢煙客，舟中候風語。

高堰晚泊

迎客都君風肅然，楊舟澹淡夕陽天。辨帆日下邊何闊，

覓港泥中腹漸堅。換蟹饒思須近市，伐蘆生計羨連船。



寒灣水宿懷空渺豈有高人夜扣舷

敘舟中往復詩 高堰作

勞者之歌事必傳天下今無征役篇飛輪絕轡不到處  
詩家物色天予全淺娛居士今少年携蒲屨負宵無眠  
吾投以機俄汨汨有如羣鮒湧井泉頃刻百篇皆手寫  
誇詫兒女呼爲仙古云爲詩亦爲政主人脫襪晴窗偏  
篇成波瀾湖水闊縱觀未已生雲煙李子鈍學諒如我  
蹇澀不出亦可憐曉聞伐鼓聲淵淵有日無風夜不前  
岸上指揮逢豪首疑是博士江村船

河柳

復艚水落自潺湲河柳青黃尙可攀圓月欲升先絢彩  
莫煙迴帶稍留殷玲瓏疑有樓臺出寂寞惟看鴉雀還  
搖落物情但如此飄飄客子豈能閒

蠟梅

雪壓黃茅淮水渾廢詩一月寂關門明窗小盞誰分餉  
初續江南斷後魂

龍仁陔方伯挽詞

精力平生小物窮空餘丹旆返寒風黃泉袒括知迎母  
太夫人後 一月亡 青史循良合傳公火烈猶存輟春愛水清自  
勵斬芻忠我稽祀典勤官在不訟甘陳昔日功

拔可言某寺有鶴又有蠟梅荒城得此足珍也

寒洲春至還歸去只共僧房歲晚天一樹婆娑原不醉  
三更獨自恐無眠

鹿港香

拌和花香飄細細雨窗殘夢被驚回欣然援筆誇鄉物  
猛省今從異域來

二月三日出遊

新春瞥眼二月三棵耳喫完腹歷鹿

二月二吃棵耳鄉諺如此臥聞

棚竅風叫鳴起視牆頭雲走簾摳衣勉後二三子步出  
城門里五六黃茅白水冰始斲桅木森森一極目風箏

百尺拽河干有似牽船車轉軸空中閃閃鱗之而誰知  
糊紙還縛竹淮南雞犬尙升天東海魚龍定游陸妄憑  
噫氣上叫譟不畏晴雷下追逐青雲仰首不自致託命  
長繩終姪嫁高飛未免丈夫慚何況瞻相多蹙蹙徘徊  
畏雨遂先歸貪戀無風還偃伏豈伊身世猶寥廓坐念  
冬春客茲局窗前高下曬衣袴室中左右堆箱簾青氈  
夢見草侵階春色意生日照屋吾妻憶母祇嘆嗟我友  
攻文極彬馭笑余度歲資唐史未夜先眠燭不措何人  
郵致水仙栽無事燂湯日再浴遨頭風味又若此藉口  
無令話孤獨馮庵先生亦不出肯和新詩粲盈幅

戲贈拔可

崑弋名輩今已希秦腔三十年來尙高絃急板聲尤悲

吹律微畏北風颭空舛老人

王鼎丞師

侯生曲頗詳敘述知

汎旺南人新貴五月仙北人自喜天明亮嗟予快耳實  
非知止似文章愛奔放荒城作客樂官拙有耳甘聾目  
甘昧舍中無事絃索鳴堂上伊優誰最彊異哉李子爾  
何才獨作烏烏能揣狀天生長頸必有謂日日羈禽轉  
哀吭自言師法極矜夸似恃鄉愚恣欺誑搖頭頓足了  
不慚聽者頗亦嗤其妄我思此意正堪傷寂寂誰能且  
復狂善書殿體必貴人行看飛去九天上不愁執笏作

參軍刺史簾前事吟唱

正陽關孔子廟詩

城頭簌簌風沙鳴城邊淡日連廟薨紅輒黃瓦制可識  
聞人稱謂殊莫明官牆大署微墮剥肅然瞻拜門樛星  
異哉州縣王命祀區區有此疑非經黨庠遂序必有奉  
按諸古制良可行或云盜者構苗蒞此說非無徵盜亦

有道頗附會勢云教令多經營包遏地險擁鹽利周遭  
樓櫓終朝成往往僞蹟未剗盡因知喜亂緣民情盜也  
嘗爲士士習襲狎狎詩書所不澤十逢九可憎至人堅  
白猶不享由矛求劍甯無靈官軍雖至莫敢廢巡檢主

祀無登餅南城駢闐禮天主老胡傳教像懸膺榻房舊  
寺近修復梵唄經過時可聽徘徊廟下何寂寞鼯鼠飛  
殿草生庭通都大邑豈異此啐酒禮畢門長扃差免園  
蔬與馬廐博士寒凍無薪烝我思聖德如天地南郊有  
事享惟精誠當俎豆戒煩數何須祠宇論廢興飲食必  
祭意固厚朝夕而奉禮反輕在人未墜苟有恃日月奚  
與燭火爭世士矯誣百可笑拜跽但知利與名固宜志  
士慷慨起引臂疾呼寐者醒去年海內興學會推原講  
習爲膺懲紀年上溯孔子卒見者適適疑且驚過之而  
反中乃得不見搯屋木引繩歸來伸紙書此意明朝不

復事荒乘

拔可將以三月歸閩贈之

李子少於我其才殊清美云何遭天酷心事如暮齒嗟  
我亦鮮民羨子乃有恃子言憂寔深門戶方子倚有妹  
須擇郎有弟僅斷爨全家待衣食遠道謀甘旨孤生愴  
聞此不如子多矣作客得所依萬事如家裏所欠體俱  
弱長者憂弗喜子有晨昏事歸路見桃李得歸歸亦悲  
我誠不如子哀情展復收惟學語可紀自我始見子回  
顧已千里天資苟有餘學問甯無底昔我有所爲微睨  
不謂爾子寔工爲文彬赫世莫比又復善書翰得第卽



太史天下藝固多安用窮人技我時喻其意漸漸道之  
邇翻反頗多姿幡然忽自改年輩但相若下問曾不恥  
自嘆日皇皇與子共憤排江西與西崑分別知避取古  
人雖去遙發篋一一在吾鄉今陳伯初鄭丈太夷有作亦  
模楷當思膏與根韓公豈妄耳自得乃變化萬象奔俶  
詭字句得失間固可助壤累我言日漸狂子色常甚肆  
卽今所有者如林見蓓蕾吁吾憂道孤賴子能不怠作  
詩敘區區惟以永相矢如或傳示人嘻嘖必夢起高識  
幸不搖陋體任成瘠子如謂我非焚灰擲流水

和馮菴

踞觚寂寂先生老  
齧指由來巧有餘  
能作千門萬戶者  
不妨堂上拜公輸

花朝飲散

雷電雲端裏  
歌呼屋後頭  
意如生物動  
愁到醉人休  
讀史輕陳亮  
論才愛馬周  
何曾關遇主  
直自不相侔

儒林傳

和馮菴三月水仙花

荒荒春色鍾冬卉  
皤皤遲開得後殘  
並世不知桃李鬧  
深居猶畏雪霜寒  
琴高變化愁將去  
神女遷延願久看  
書幌因依瓦盆養  
不階尺土豈爲難

赴飲沫河大雨夜歸

龍祠凍雨驚狂客六扇門窗隔疾雷五月秦淮河亭飲  
只強紅粉與傳杯

硤石停舟搖客夢風波月色一時併歸程五里城三鼓  
今夜還聽甕盎鳴

卽目與拔可

牆陰地下澗春潦便被兒童喚作池微雨復來時點綴  
好風肯至亦漣漪白鵝綠鴨容相就蚯蚓蝦蟆聖早知  
江海自方吾與子看渠泛泛得多時

拔可束裝再贈之

晴天自起行人意小疾偏逢寒食時直想見期先一快  
猶存別色得無癡歸甯堂上多君慶致媵裝中有我詩  
爲問詞人王又點暫時覲面竊相思

南塘詩三首并序

南塘者正陽關圩外舟楫避風春夏時咸入於  
此塘上大王廟鹽務官商宴集所在茲地特爲  
佳勝歲三月李子拔可沈子弢甫將歸福州同  
人連日出錢爰爲詩三章抒情寫景或以遺後  
來之好事者焉

南塘水漲多新景河瀆神祠壓淼漣梳影涎涎過屋角

水鷗跼跼下花間鋪行什器堆船賣士女春衣上冢還  
風物荒城惟有此却思歸路可追攀

南塘水漲多新景連日無妨取醉吟窮眼難逢花滿院  
春愁誰見柳成林依依酒半將移晷采采闌前欲去心  
上巳清明歸併了只除行樂總休侵

南塘廟裏花爭好我與櫻桃獨有情來度清明思略似

回尋詩句夢頻更

誰念離人愁斷絕櫻桃花  
下過清明甲午京寓詩

柁樓驚豔

闌前過絃柱含聲醉後鳴并合要將愁力勝不堪風景  
滿前生

### 南堤桃花

堤根數樹對泱泱傳粉施朱自試妝淮水東流思不盡  
春陽欲暮日初長山僧栽種開誰管游女經過折或強  
自被詩人誚輕薄柳陰不妒有鳴榔

送春擬韓致光

循例作詩三月盡眼遭飄落太驚心拆成片片思全盛  
綴得疎疎祝久禁肯記帽檐曾競戴無情屐齒便相侵  
冬郎謾把傷春酒早日池塘已綠陰

四月雨

日出潸衣雨復下天公不愁寵婢罵勃姑將婦來覩人  
持竿驅之了不怕雨晴於我何所分亦愛窗間有夕曛

下筆時時成一笑雕蟲應不與斯文

江南雨熱梅初黃淮北雨冷川漲長人言日發二三尺  
鹽舩銜尾還兩塘故園大水年年洶昔日兒童那知恐  
夜半官河浸入庭起抱花盆墊書籠

贈周少蕃

畫地學書聞充國磨甑作紙見周生吳鉤自厲誰知苦  
柳脚能傳世謾驚手凍寒天資熨斗質瑩深夜映燈檠  
他時圖畫訓賢母記我詩篇勸力成

贈別三彌彥侯歸試

壯志開歸路居人抑別情雲開逢月好風到送絃清便

有無涯思眞非常日聲贈言期一得剖璞見連城

坐月與歸試二君

闇坐無燈思一靜暑生得月意成涼垂簾教作窺人態  
閉戶因嫌隔壁光欲下沈吟如顧影送歸微嘆想回腸  
行人明夕江頭望照我遲遲尙念鄉

牆下金絲蝴蝶一本馮菴移理之開花予爲賦詩  
初看默默隨春綠肯顧無人開始知桃葉前生猶可辨  
亦呼金絲桃葉似之雄蜂無偶亦相思由來評色惟推淡一日承  
恩不怨遲頭白老人欣對汝閒庭蔭暝伴思詩

友人送末利栽之謂不活矣近漸有萌芽祝之



包寄逾淮及始春搔膚搖本敢云頻也逢夏至爲生日  
欲說南強太媿人水閣醉魂驚扇重秦淮曲中如此街棚茶話  
鬪毬新福州南街夏夜景物舊遊鄉事皆難得慰我無言或有神

窗前細竹

相遇惟期共歲寒雨風也獲一窠安覺來便有凌雲思  
莫作娟娟牆角看

稻芒差小蘭芽大細數頻來亦有情一樣風吹兼雨洗  
只餘墜籜不聞聲

吾廬得地亦非寬歲計常添一百竿早識愛緣多銜觸  
不應兒日事摧殘

和馮菴十五日晏起濤園扣門之作

夙興弟子原當爾高臥先生也謂遲只似侯王懲倍約  
那從傳記覓嘲師朝陽可吸功難學夜夢能清神不疲  
摩眼作詩餘整暇故應竊笑舍中兒

馮菴詩云軒於晚翠早劬書

隨地名軒無不可得閒寫字亦相宜援毫未解心先畫  
入格深慚手似槌此事養和承平日幾人變法中興時  
斲輪老去猶堪用莫使後生空得師

和外舅翦花之作

長吏風流初著手詩人欣賞兩操心剔搜一葉教無隱

蒙密逾宵禁更侵西子貴時愁傅粉麗姬嫁後悔霑襟  
時來得意還如此那記牆根草露深

和兩先生諷早睡之作

詩橫胸際眼如釐月近牀前警若神真怕打門租未了  
頗嫌閉戶相能貧微吟漸有蟲飛和別室難將鶴怨伸  
敢外先生求印可尙從新得誘逡巡

石榴請馮菴作詩

材官家裏開能豔書客瓶中供有常怕熱却成相對惱  
過冬尙逮去年嘗尋思仙洞兒時句狂想塗山舊日妝  
敢乞先生爲下筆紅裙白髮看誰強

小盜明燈掩映姿淺娛齋裏日長時天生正色莊難笑  
人道無情感自知毒口只憑呼俗女禪心原不惱毗離  
詩家遇物須償債誰遣逢花便折枝

讀外舅石榴詩因述

樹當夏日功尤赫根渥淮流產自雄火色貴人愁不再  
餘姿女樂嘆無同傷心鞞影雲頽黑照眼旗痕水黚紅  
感物造端慚未逮尙能尋繹發無窮

外舅哀餘皇詩題後

七日動心驚帝醉百年被髮卜人爲靜觀始驗過庭語  
盡瘁空追籌筆時易佃舊畚看滅裂經行藍華付隤摧

分明家國千行淚詞賦江關漫道悲

述祖德詩

父母不逮事百事不足爲不諱王父母此語深可悲恭  
維吾祖德敢云吾知之外舅沈濤園激揚多厚期本於  
先公意詔我家乘遺謂言承積累宜作爲歌詩小子實  
兢兢靡日而不思命名不得咳抱孫未親懷永念臨沒  
嘆況積孤生哀愼重良有以聞見求無歧託始三四歲  
所記可依稀聞人說公公作官在安徽信歸向兒道公  
公念着兒分付教爾雅明年爲延師堂上張小照於此  
識鬚眉。慙眊畏嗔喝。每過首必低壽辰五月八學把阿

婆后酒闌凶問至驚哀終日啼是年唯己卯此後多傷  
悽吾父麻衣歸遷居旗下街庭中龍眼樹書案設當階  
手寫不記紙淚下時如縻竊窺顏色惡側坐不敢哈心  
目憶可見禍酷痛交摧易簣執手泣太息兒尙孩年至  
十二三書簾恣翻披吾父曩所述手澤如新題先府君  
年譜男某謹次排東流隨宦記言士瘠民疲粵寇凡三  
至城內冢累累生齒旣未復文教非苟施邑中鄧析子  
好持官是非好召與之語鋪以酒肉糜襦袴爾所利鞭  
箠官有威感媿或遁去自此獄無欺又云戊寅案文書  
存可稽別本逾寸厚細鈔累萬微敘述似未竟欲傳恨

不才童騃究未省今知意在斯犬牙相錯地自古言多

違爭桑處女傷漚麻吾水竑寺門夜載藁界上晨亡屍

豈嘗飽毒手直是支誣詞閱實赦無罪譴張謂有私風

流秋浦咏響絕不可追

池州府吳姓

視錢卽甚悅含怒故多

訾人情易反覆如萍隨風吹獨持南山筆嶽嶽難得移

媚人猶及止殺人奈何哉安慶孫太守控告義所希

穀孫

庭先生致書手錄存十紙

祖父手錄

兼有當時詩天知民不

媿睡起心自夷

卸事將赴省寄孫太守林司馬調陽詩後半云未必同舟皆按劍誰知陰雨獨

吟詩此心天鑒民無媿口統如引舟去寄語淚勿垂白

骨可覆視黃泉豈遂埋忝名爲父母那忍事委蛇民冤

苟不雪罪大亦何辭列書達制府

申請揭驗

制府驚且疑爲

民能如此豈非良有司事實良未明萬一亦可危私誼

況桑梓

沈文肅公督江

人言有階梯移文召伍伯

調江西著作

破

棺求瘕瘻萬目見日月一朝挾雲霧父老喜害去

施守視職

道路迎君回還愁升擢去豈悟運化推廉吏竟如此天

道諒可知先世有薄田亦足供歲時爲官而祿薄不以

家人隨五年古彭澤清對菊花杯中間更事故斗米豈

勝炊負郭既不保沒身反得瘁嗟此實明德感念空增

歎匆匆二十年一得而九遺誠當書此事留布諸方來

民情苟不誣知有望江碑天閣苟不遠恩澤敢妄幾吾



父一片心不與七尺墮。七月急歸去。尋檢舊書齋。情知  
漸徙失諒。未付塵灰。老師吳峯五表叔魏幼施。當時皆  
目見。故實良可咨。縣社有雞豚。官府有檔批。成詩餘涕  
淚。令名思用貽。

申報送至馮菴相次成詩

邸鈔不仕元。堪斷申報無文那。足看要見詩翁作詩手。  
風吹春水遣相干。

六月初一日

月朔重申晨夜命。貪眠自訂奈吾頑。臥看露瓦籠金潤。  
起待風簾颺練殷。花鳥鮮妍人氣靜。屋廬深遠市聲閑。

詩人得意多斜日不爲朝陽一破慳

初三日呈馮菴

難得先生說止詩恰宜懶性與開眉得閑眠食休相擾  
無故悲愉只坐馳飛鳥遺音情欲息春蠶課繭腹憂飢  
閑房長日聞微諷便似蘇門回首時

初四日

黃花隨折復隨開選事庭中日數回吹面好風斜日下  
廚煙拂草過牆來

尋詩竟日只無題書卷都拋旋旋迷如此長天翻不讀  
可知不及漢征西

先師陳幼蓮觀察遺文綴言

斷璣零壁散不拾田父夜驚莫敢藏青箱世守亦僅僅  
深鎖何殊塵網涼當年有作必寫與楚亦有分旌與璜  
時時開視甯忍讀六丁下取須提防惟天生才加以學  
小子辟席徒窺牆追穿戴籍吸元氣淺才薄豔下奔忙  
古者文章重制誥至今獨數常與楊聖朝責實所弗尙  
諸侯僑戍爭求良由來陳琳阮瑀集存者縱富已已亡  
香山居士尙律切少陵野老窮鋪張論詩宗尙見百一  
空積腹中千萬章茅亭六月憶新落左右花草羅丹黃  
終日相呼語不盡三復共賞味逾長鍾山回首竟終古

三年忽忽永心喪獨念遺文後死責名山何日發輝光  
留別馮菴

四海舟車正大通東西爰止總相逢三年得侍看成易  
一別方追憶可重求道鑽攻資苦語治詩摘引美神功  
古磚如石心如玉持奉猶嫌比不同

謝馮菴菜羹

一動歸心食指隨盤殮爲別已精治菜園漂盡官廚泊  
肉味三年亦未知

客有詢幼蓮師世兄者書憶

重闌色養若親身別日麻衣感尙新聞說今年當娶婦

師門歸去見成人

留別南堤

頻來樹下得閒行  
臨去何辭沾滯名  
水面風搖金一片  
日光柳色晚天情

與熊子嘏

好事相尋信有緣  
肯鈔詩去愧流傳  
止堪留作停雲記  
不忘南堤五月天

借書每日見辛勤  
自說家藏付蕩然  
亂後山川輝潤少  
要思人力可回天

兄事深欣長五年  
處君當復許相鐫  
詩人元與窮人異

自致昂藏莫可憐

馬房溝

昨日老子山雨打又風吹今日高郵湖過湖日未遲雨  
氣化爲烟何處露筋祠金葩揚翠蓋空中見參差徑行  
忘混漾難進慚逶迤新蟬第一聲欣然得聞之淺淺綠  
鋪褥高高青垂帷霞光由外鑠倒蘸水之湄藍滑如潑  
油紅豔如凝脂捫之不著手脚踏跌爬龜千載苧蘿溪  
人言浴西施揚州夸佳麗此理信可推如何殺風景火  
輪衷而馳何殊鐵如意打碎赤琉璃刀剗織女錦車裂  
文君肌拍泥斷萍根吹灰黏柳須慚極急遁去犬吠非

關誰湖光挾隄樹苦苦遠相隨清麗與幽淡萬狀難具  
辭仍爲詩人貺不同湖寇追柁樓得晚飯新月正如規  
焚楮舟謝神鳴鑼官稅釐荷香不見花暗裏勾我詩風  
浪一回回首既往亦勿思

### 洪澤湖遇風

清晨過龜山水勢凌日盛突兀淮瀆祠空影浮相映我  
思無支祈何得竊摧柄古后逭其誅後世及以政夏鼎  
民可知魯囚吾不敬廿里老子山私念未及竟大風翻  
然起天水勢一迸長桅勢忽傾連舫聲相鏖有力皆上  
掀無雷欲下轟南轅折不回退鷁旋復迎衆喊張臂持

萬漚陷胸迸竭力乃拋錨遇浪如碰釘鼓輪就淺瀨牽  
繩依幽屏船身頓而蹶墓腹號以膨激石居未安得雨  
勢益橫家人吐狼藉水鳥飛覘矚我心知其故且臥待  
其定召寇固有因論理亦太橫欹枕久不甯褰帷若有  
偵何物類獼猴跳踉赤臂脰大笑至口耳其語乃可聽  
輕薄神所羞馮暴爾何輕但遣稽程期未至憂性命禹  
老啓方幼威福惟予正庚辰與童律不用且久病世人  
不悟此輒思與我競大鵬犯天蓋長鯨攬海鏡以予較  
之彼猶自羞陷穽遷貿詡器利矜盈謂氣勁一敗遂爲  
羞大福至不更無乃過夢云制身宜自訂言畢忽無覩



風息夢亦醒

與石遺大興里飲罷過宿有歎

往日矜夸一任謾遠來共醉事殊難高樓罷酒天初雨  
短榻挑鐙夜向闌流落傾城同一嘆忖量終歲得多歡  
此懷恐逐晨鐘盡留遣回腸報答看

洋涇橋與太夷丈對月

河干風月足情文暫獲相從清賞分夾岸人多俱有役  
當樓曲好與誰聞傷春日往心猶在興利時迂議尙紛  
不遣詩人憂世事還能回眼醉紅裙

滬寓卽事

隔浦車塵漲暮天虹邊門巷漸含煙獨謠負手誰能喻  
百計安心或未賢王粲憂來空假日嗣宗醉後只酣眠  
河流樹色甯知我眼底憐渠盡意妍

張園同旭莊四丈

樹影鞭絲一瞬中如何行樂絕匆匆少年爲客思還勸  
舉國從人懶獨雄隔座嬋娟憐好月回車駸駸夢涼風  
平生看竹饒真賞剩愧題詩總未工

舟行一首

射陽天影接樊梁湖水交流自一鄉蒲長陂陀難辨岸  
舟行深窈但聞香眉痕窺戶江南綠雨意斜空樹外黃

眩臥海風吹忽警似緣好景不能忘

上海胡家開茶樓

已近鄉心那得休誰曾一笑妄成留依回避疫情何怯  
牽率言歡意易道十里人聲趨短夜百年海水變東流  
閒來獨倚原無事只爲涼風愛此樓

還福州海行二首

客吳思越此成回雲水多情識我來白氈千重遮日走  
綠荷萬頃泛風開車音聽入江干別庭樹歸尋舊日栽  
仰屋波光看不定頓思微醉玩深杯

屬水雲垂日半黃峯巒漸熟却深藏輕軒豈是人能使

俯仰翻嗤山太忙  
旱疫應知鄉事苦  
藩地未識國謀臧  
坐窗兀兀眞當瘦  
不爲微生感獨長

福州寄內

人海投身未作謀  
多君送我思何周  
江干燈火殘宵月  
客裏園林臨別游  
攜手何當歌有道  
寄居聊得顧無憂  
入關志氣吾能勵  
望遠凭高莫自愁

八月十四夜拔可宅中露臺

家山風物別成忘  
良夜乘高試一望  
月靜方知雙塔鬧  
霧低惟覺滿城香  
驚枝宿鳥難安夢  
聞笛離人易斷腸  
直恨清輝同萬里  
誰言秋思在他鄉

與拔可別後却寄

少年爲道欲安心莫以端居擬陸沉叢桂小山真好住  
白華處子孰能侵書聲課弟燈初上竹影關門雨自深  
新爲高齋作寂寞據梧不共夜分吟

再寄拔可並訊仲奮

客還孤陋少情親厚我猶夸李與陳絕羨殺雞人有母  
直呼作黍孰爲賓欲言已盡原堪去相見方秋更待春  
路曲樹陰壓清泚記同詩客訪經神

寄陳仲奮

謀身或未能輒有當世意夫子愍其狂登高共一慨山

河猶吾土胡爲視若異珠玉久不生悽愴少輝媚嗚呼  
誰使然已矣非人事

吾黨二三子望古期一至卓哉豈不賢行處人或避羣  
陰方剝陽山高不絕地政使隨俗耳誰得謂非智煩君  
但一計何以安吾睡

丁酉九日泊舟煙台寄鶴亭二首

別君若翌日登舟作重九萬里好家山翩然得我友主  
人掩戶出巨盜窺所有已去俄復來居心疑不厚莫謂  
國無人一旦落君手

落葉未足悲覩寒情一至孰云東鄰女不下阮生淚此

意旋自隱妄謂止禮義不圖揚其波乃使慚無地泥犁  
誠對簿君亦無所利

呈黃太守國城

戴義全家未敢誼十年事往尙煩言同舟有劍傷孤按  
入井無繩賴手援當日一州推直道古人駟馬望公門  
心知邂逅非容易恐是先靈誘幼孫

隣鶴吟

劍題寢貴采鶴唳延悲聲西鄰有羈客聞之繞室行已  
無親手飼甯爲告飢鳴奴隸謂欲去恩義懷無生葉落  
樹寡色露寒天不明嬋娟掩中戶蝙蝠飛前榮華表歸

來日相逢或一驚

代書與里中親友

推戶驚風大聽詩聞雨來五年終夕話三客異鄉回歡  
阻河陸月心傷里社災別懷知未釋寄與短章開

戊戌元日江亭卽事

倚闌雲起亂鴉呼黯黯西山望未無乍入閭虛催夕景  
還連風色散平蕪主憂避殿當元日臣職操兵見奮夫  
如我閒官神所笑何祥欲問自疑迂

同陳清湘飲唐沽酒樓

憶憶船行煙尙屯蕭蕭旗響水爭喧吳兒涕泣君休笑



忍見邢貞入國門

杜陵家室吾方問通德鄉門子自昌逆旅匆匆聊命酒  
相逢莫道馬賓王

寄內

曉色驚看月滿窗池廊雨歇水淙淙酒醒作痛何情緒  
夢見吳淞十里江

六月長安無一事借人亭館看西山鹿車甚處堪同挽  
留滯何因卻未還

同琴南拔可稚辛至雲栖題名而去

江路山光百轉新靈關雲木倏相親全收雄突歸深窈

不露莊嚴自淑真脩翠含陰留宿潤雜花浮水散幽春  
誰知未是逃名處尙有亭前泚筆人

禮蓮池大師塔

天外飛禽逐磬音石壇幡影見深深詩人宿具開山手  
世難旋移卜隱心老樹刺天青自直空潭留日綠還沉  
有情多是栖栖者初地微茫豈易尋

答幼遐前輩示詞

邂逅真非常樂論陂邊鷗鷺怪紛繁看山留目依吾土  
書笈迴思入小言雨急更催愁日晚花清自照忘杯渾  
龍沙請念憑何物政要先生秀句存

酬徵字江亭談詩見贈

論詩如文較多派能驛衆家卽無害孤生爲道頗自封  
比來稍欲觀其外幾人南郭空連牆誰士郊途忽傾蓋  
細思離合似有緣妄生分別旋自戒迢遙上奉一詩王  
四國交侵無經界斷斷執律欲正誰空使達人笑多怪  
感君廣我用意多惟是褊心將永賴夜窗病渴玉泉乾  
三復佳章舌根沛日夕西山在眼中此乃吾家真晚翠

直夜

鳳城六月微涼夜省宿無眠思欲殫月轉觚稜成曙色  
風搖燭影作清寒依違難述平生好寂寞差欣咎眚寬

身鎖千門心萬里清輝爲照倚闌干

呈太夷丈

聞命書思旣竭才池亭起早獨徘徊寒生曉夢知方雨  
雷轉秋陰喜漸開救僞未妨行督責乘時自合仗雄材  
先生平日吾師事試問如何區畫來

頤和園葵花

瀛海分餘潤秋暉亦聖恩撫心無媿汝飄落復何言

獄中示復生

青蒲飲泣知何補慷慨難酬國士恩願爲君歌千里草  
本初健者莫輕言

晚翠軒集補遺

宜州作

便當西去躡深幽古佛精藍記上頭應被山靈笑逋客  
已輸羣從擅清遊枯腸準備酬高唱傲趣甯須託故邱  
擬向三游乞泉水清冷稍爲滌塵愁

醉後賦謝

不醉復何事能狂亦自佳祇應煩地主稍得散閒懷歡  
笑春生座徘徊月上階可憐無賴意病酒早安排  
候舟行未得留滯亦徒然豪飲又今夕沈吟憶昔年雲  
山違咫尺聚散悟因緣不惜扶殘醉還爲拂畫箋

再賦二律

去鑑爲妨月被酒但呼茶蕉萃空如此嬋娟共幾家能  
豪感同輩極意惜年華便作傷心語旁人莫道差  
此間頗作客慙愧累華筵得句勞相慰縱談忘失眠未  
勝賤子感多謝大家賢來日滄江去虛留惜往篇

卽景作

日光欲下卻徘徊雪意成陰總不開已是寂寥當臘盡  
好教點綴待春回流連歲事誰拚酒料理詩懷及看梅  
相聚差無流寓感肯爲覓句費清才

奉酬彥脩

都中得彥脩詩將依韻答之會有他事遂廢歸  
過武昌聞彥脩以來而不往頗不喜因復足成  
以副其意

神龍不見飛騰迹健力有如作詩客鄭郎學古窮攀追  
揮斥陽阿謝爲役夷陵作客足詩情春來應折遊山屐  
嗟予逐隊走紅塵天涯忽覺吟身隻把玩君詩欣歎兼  
多謝深情慰迢隔

又贈七絕一首

雅量如君信有餘論詩那僅涉階除少年同學多文藻  
若說沈思總不如

甲午春闈報罷路過武昌爲鄭叔昭內兄題芙蓉

簋面

羞將塗抹儻凡豔自有芬芳入妙文心緒卽今漸搖落  
秋江無那又逢君

贈筱輪

三朝坐甲帳十載雪霜寒瑤臺此中是何處學鵲鸞  
不如逕輸情玉臺免簿責彥回羞見人障面了何益  
臘酒及團圓新春增婉孌益壽故自佳何物近禁鬱  
句

老子山與拔可



老張人比雲龍好小李詩如白石清

靈隱雨中

貪看湖光猶畏雨靜思世事欲逃名

上海雜詩

鏡中濕影枯春淚車後驚塵損玉顏  
后土深深愁玉化行雲薄薄想魂歸

晚翠軒外集

應試作

韓文公夢吞丹篆賦以文公少時夢吞丹篆爲韻  
柳子厚龍城錄載退之自述夢吞丹篆事頗誕  
異疑未脫小說家言顧昌黎生平挽文海之瀾  
延聖道之緒雖資學力亦由天授是知華胥親  
入列子之說有徵秋駕能傳呂氏之談無爽稽  
其故實賦以今制敬本彥和數寫之旨願附子  
雲麗則之義云

韓文公瓊琚拔藻黼黻揚芬冠儒林之選總大雅之羣

辭章振徐庾以還光迴日月撰述擬周秦而上義約風  
雲可曾青簡親披讀盡神仙秘笈合有黃衣偶降助成  
典冊高文方其受經弱歲馳譽成童始泛詞源之水將  
騫藝苑之風隨南去之遷官池塘詠草感西歸而應舉  
殿閣吟桐丹漆從持示象應瞻宣聖丹符學執占祥未  
事黃公幻豈思生事非意料忽若神來疑爲帝召豈衍  
波授紙女郎憐蕭貫之木豈兜率鐫銘仙叟許元卿之  
妙共道篇成鳳采甘泉有待詔木人可因譜繡鴛針月  
府盡登科年少其夢人授以丹篆也綰疑春蚓蟠訝秋  
蛇光華煥於禹簡形製別於秦碑史游急就之章同斯

詭傑皇象建康之石遜此奇離金薤森垂天上之寶書  
列幾瓊華隱起洞中之銀汞成時其使之吞也如寶斯  
含如珍斯舂饋貧未必須糧益智眞堪名授匪談奇之  
士斥糟粕於五經匪註禮之儒釋蜚靡以百寶胸羅廿  
八眞鍾列宿之精腸具五千迴異二交之夢何人拊掌  
顧我欲言上界散仙相通官府神山舊侶都近崑崙烏  
幘風流曹子建遺文求序赤衣縹緲尹知章時輩稱尊  
我爲雲而君爲龍奚事東西之望失則齊而得則楚漫  
誇八九之吞時也風迴亭闕月永闌干旋裾忉利推枕  
邯鄲記書味之初回甘同青果啖日精而尙熱珍比朱

相同他擲。校。歸記曲而雲疑擁紫待。到鋪。擲。就勒  
碑而額。孰書。丹。是其宜。樹常呼趾離善遣契逢則東野  
偏奇。授受則習之最顯。星冠仙吏來追六甲之符。雲錦  
天孫爲織同功之繡。豈僅翰林香火共尊土地之神。須  
知石鼓詩篇不取蟬山之篆也。

賦得十里南風草木香 得香字五言八韻

歸路南風起吹詩入錦囊。一州蕃草木十里散芬香。分  
騎人初去揮絃序未忘。麥都登隴熟竹漸近山長衆綠  
侵團扇濃青撲彩繡。恰當斜日郁時共暮煙。颺盤馬留  
芳迹吟蟬趁晚涼。招提回首遠夢境證迷茫。

榴花洞 七古

避秦之境古所耽影事偶襲桃源談永泰距今逾千載  
空餘山色堆吳藍當時逐鹿來樵叟遂因傳遍世人口  
若教把臂竟留卿福地誰知此閒有游人枉自訪洞門  
洞門何處雙石蹲秉火求之不見底水聲飈飈蝙蝠喧  
如聞日月壺中別終古榴花根盤結一枝曾遣到人間  
自開自落更誰折此邦輻輳稱通都聖泉寶剎雲霞扶  
前者忠惠後忠定風流題詠今留圖我家近住東山路  
勝蹟略能道其故山靈深望飛蓋遊自古登高屬能賦

露之養

富歲子弟章

有繼雨而養。養麥者若難恃其養焉。夫露以濟雨。善於潤物者也。麥宜益可恃矣。而若難恃其養者何哉。考之月令。白露降於孟秋。知不徒大雨時行。夏之功爲長養也。夫象徵湛澱。曾歌夜飲之章。而利溥沾濡。足係春農之望。平曉其既遲乎。覺承者不必盤之擢而待者。猶是犁之挾已。吾言麥之熟不同。由地之肥磽。遂及於雨。豈不以時雨之養不私一物。無異於甘露哉。然而難言也。試進徵夫露。露之精屬軒轅。猶雨之候占辰角。此太史所宜告也。東郊出而覲土。方仰茲布護。用徵勃發之機。主露之星爲天乳。猶好雨之星爲大畢。此保章所

爲詳也。靈臺登以視祫正，藉此滲滋，預上桐生之頌。然則露之養彝麥也，不與雨同哉？吾乃深念其養矣。露之用甚異，嘗有吉蠲告廟而降芬，陵樹答人主之孝思者，此亦如雩祭既處，遂頌嘉樹耳。養則非言其偶也。覩溝塍之刻鏤，不過於垂穎鋪菜之下，遇質而胥零，露之應甚神，嘗有惠政在民而集瑞郡庭，著長官之闡澤者，此亦如頌聲既洽，獨降甘霖耳。養則第論其常也。望原隰之龍鱗，惟是於曉風殘月之中，無聲而潛潤，蓼蕭聯兄弟，視大田美會孫，露與雨固並取也。其或有兼葭渭水，路賈伊人，覩斯露也，頓增其感慨乎？若以養言，則葦蕭



凝液。非登瑞應之圖。草樹含滋。靡入吉雲之國。有甚幸乎。露之養。且難必乎。露之養者。已醴泉並而符瑞呈。視時暘協而休徵格。露與雨。又有同符也。夫豈無棠蔭召南。風貞女子。履斯露也。因寄其禮防乎。若以養言。則洧野東馳。但渥圃田之草。滌池北醴。空滋周苑之菅。有重被夫露之養。且空冀夫露之養者。已。蓋此粦麥也。謂非露之所養。不可也。且謂非雨之所養。不可也。無如其養之不齊。天事繼以人事。不獨地之有肥磽也。欲其同得乎。

賦得甘露時雨得甘字五言六韻

願見東封盛時和雨露覃崇朝方著象潤物共成甘瑞  
並黃雲應光還赤氣參凌霄看擢掌灑路待飛驂芝想  
莖歌十茅新脊獻三文園遺藁在獨有所忠諳

以上律賦一首試帖詩一首七言古詩一首又四  
書文一首試帖詩一首清光緒十九年應福建學  
政侯官縣試童古及正場  
取第一名入福州府學

子曰吾猶及史之闕文也有馬者借人乘之

事有關於世運者聖人若幸其及見焉夫史闕文有馬  
借人二者王澤之遺也然予之及之亦僅矣故念之且  
生百王之季其流風餘烈僅一二事之留有心人慨之  
而未嘗不幸之也夫一二事之留於世亦復何補然使

後生小子因此而知大道之隆不至相習於矯誣相安於澆薄則人心世道繫之矣此聖人所極不忘耳春秋時去古遠矣然古意間有存者子嘗舉所及以示人曰先王之紀事也使之信以傳信疑以傳疑而必定其義例之所安卽至藏之名山副在京師猶多不載其詳之事故記動記言之官設上下古今之故常著於千秋先王之立教也使之有恩以相愛有文以相接而又權其物產之所出俾之損此有餘濟彼不足而無弗得其所之憂故尙忠尙質之弊窮交遊投贈之風獨盛於近代所謂史闕文有馬借人者非與其有成一家之言哉

候則附六經。雜語則齊百氏。讀者許其才焉。闕文則非  
誇博綜矣。夫人禍天刑此言。或有懲而發而秉筆以修  
實錄。獨有不敢自欺者。其風尙也。所以舜典非無臆簡  
而不容增。協帝考文武成。亦有遺編而未嘗載。觀兵之  
說。其有生全盛之時者。敬年則朝有賜珍。矜寡則野多  
滯穗。論者歆其遇焉。有馬借人。則惟存崖略矣。夫先人  
後己。此情或有矯而然。而損駟以恤窮交。實有不能自  
己者。其本深也。所以腐著驚財及門。不醜貨殖之行。犯  
義踰侈。當世猶斥游俠之名。夫吾生也晚。故多弗及見  
也。然此二者。非吾所猶及者哉。讀盤盂諸戒。田獵諸箴。

秘成之傳書已罕然居魯近聞史克遊周遠問伯陽閒  
嘗昉彼成規作夏五郭公之例他如蔡墨未詳載筆氏  
族守其前聞倚相不名著書擣杓疑其定本筆削所及  
猶得采數家之旨趣與爲參詳則諸君子之去人未遠  
也考睦嫺諸典任卹諸政有司之讀法已虛然分金纂  
鮑叔知貧挂劍識延陵篤舊尙或著其嘉話愧乘車戴  
笠之心至於征途不惜脫膠與館人全其誼遇雨未妨  
假蓋於卜氏諒其情轍迹所周不過取當代之風流藉  
爲宏獎亦名公卿之詔我實多也嗟夫兩間元氣之偶  
存實寄諸先民矩矱三代遺徽所散著時得之早歲見

聞會日月之幾何而遂至於今耶

### 舟車所至

以舟車驗聲名極之所至焉夫自有舟車則中國蠻貊皆其所至矣試爲至聖徵之且上古之疆域狹於後世者有所限而弗能至耳自乘桴之制既變結蓬之象亦興於是舉弗能至而至之其制日以詳卽疆域日以廣疆域日以廣卽其用日以奇海可航山可梯至合萬方之巧智以赴天子之聲靈者其象可得而擬焉至聖聲名之洋溢施於中國以及蠻貊夫中國之與蠻貊其始不能至也而至之者惟有舟車共鼓貨狄既往矣舟之

因境而制宜者固與車並致其功然不過法問番禺經傳伯益而未有於赤縣神州而外別得異聞吉光相土既遙矣車之改作而求精者嘗與舟各分其用然不過巧稱夏輦撲昉虞彤而未嘗於八紘九野之遙獨傳妙製乃者宛渠之民何所乘而入越裳之使何所藉而來夏后負龍之馭未足以程奇周王駕駿之遊未能以較速無論裨海瀛海水之所域舟必底焉農土沃土土之所演車必臻焉蓋舟車之用始自中國以至蠻貊其後蠻貊亦能自至中國琛賁由此以交集工商因之以利用此非至聖聲名之洋溢不致此是可卽所至而觀之

則或慮之曰先王懲罔水之罪却飛轡之珍淫巧所由  
禁也不知宇宙之精華不能不洩生人之聰明不能不  
開因而利之殺而用之至聖所以爲大耳夫舟昉車以  
行水儼具輕雷砰隱之奇車法舟而蹈虛真有元氣運  
行之妙豈非亘古創聞乎以彼竭其心思積其歲月以  
來獻有道之廷我乃安享其成功有兼收並蓄之量焉  
且或疑之曰古人謝擊汰之能罷都盧之戲羈縻惟勿  
絕耳不知王者之規大一統故無歧視之心春秋之義  
大居正故重羣歸之望德以懷之威以警之至聖所以  
稱神耳夫乘風者萬里可周不必樓船而習戰伏軾者



崇朝畢徧宛如枕席之行師豈非一時快舉乎即使恃其機巧保其險阻欲上抗天邦之衆我已悉收其長技有遠撫長駕之模焉然吾於舟車徵其所至固合凡有血氣者以見至聖之莫不尊親耳

所謂故國者非謂有喬木之謂也有世臣之謂也國以故稱惟世臣足當其指也夫猶是國也而謂之故豈爲喬木言之乎孟子明世臣之當有以告齊王也曰臣觀封國之誓申以帶礪祝之苗裔始未嘗不欲固其根本而枝葉稍卽衰微也古人嘗慨之特取國所與立之本而崇以人惟求舊之稱俾人主顧名而思義其意

不可謂不厚而或聽而弗察卒與耳食無異良可慨已  
夫故國王之所嘗聞也王聞之王亦審其所謂也耶士  
食其舊德農服其先疇就國之風俗而言所爲樂利相  
安者有其使之也有其使之故與爲推原之論而不昧  
所自來等級明於朝汙萊闢於野就國之規模而論所  
爲昇平永享者有其致之也有其致之故特存倚賴之  
思而勿忘所歸美然則或謂爲喬木之謂者殆非也登  
高而眺故墟松壇不改河東之舊柏壇猶留殷薄之材  
鏟削既歷屢朝豈能對生意之婆娑謂神明所由託讀  
史而稽地志江南多竹木之饒關中有檀柘之利廢興

迄無一姓並難因地力之殷厚謂胄裔有必昌其惟世  
臣乎其少年屢經變故故其舉動一國常視爲重輕而  
老成典型復有以默正君心而造民福盤根錯節之任  
非偶然矣夫慕名相之風賦廟柏而欽正直過賢人之  
里撫手植而慨風微寄託無端觸物亦多珍重而喬木  
遂見留貽爾其先人累載勲勞故其子孫小民倍深其  
愛戴而世家賢哲復能恪遵訓志而篤忠貞落材取實  
之謀無逾此矣夫歌興有李王風尙思舊族之良愛比  
甘棠晉人共永名卿之德謳思所發屬辭幾費低徊而  
喬木亦蒙鑒識已是故卽所謂而求其徵則知台輔空

虛雖舊造之邦不足恃將相和睦卽新集之衆易爲功  
昔在殷宗遷都而延由藥詔以乃祖乃父無忘肆享之  
靈其深明此意也夫且本所謂而重其選則知義緣相  
助而無功名震主之嫌法取相維而無勢位貳君之慮  
昔在昭考封弟而鑒梓材示以達王達民各致肯堂之  
業其洞悉斯旨也夫臣乃爲王慮矣

賦得滿山秔稻入閩中得中字五言八韻

一入南閩境新秔滿眼同客行山色裏秋信稻香中驛  
道迢迢接鱗塍曲曲通歡欣迎虎節開闢到蠶叢露積  
連屯白霞蒸斷嶺紅霑衣霏瘴雨吹簫叶齒風地勢稱

天險人聲樂歲豐嘉禾應獻頌大有慰宸衷

以上四書文三首試帖詩一首應清光緒  
癸巳恩科福建鄉試中式第一名舉人

意欲教先詩格較彼為高矣  
右二詩新作似不惡後首尤勝然寃解  
人宜難見下知者故寫寄一賞之後  
詩使墨海見之必將款款太息志長  
楚草黃之流也 墨下新婦里必無暇  
作詩讀古人詩望能自得好路意之佳日  
所共講求殊不盡然過猶不及 墨下過

取狂言便覺眼中皆草未思齒詩入  
他人口中皆刺藤也刺藤有何可  
貴欲自控制不能故用相告五月不  
歸七月必歸彼此不吝寫信皆相  
見也  
援可足下 旭有 四月初一日

堤根數樹對決、傳粉施朱自試  
糴淮水東流思不盡春陽欲暮  
日初長山僧栽種開誰管游女經  
過折亦強自被詩人消輕薄柳陰  
不妒有鳴榔  
南堤桃花紅白雜開



循例作詩三月盡眼遭飄落太  
驚心折成片思金盛徽得疎  
祝久禁肯道帽檐曾競戴無情  
履齒便相侵冬郎謬把傷春酒  
早日池塘已綠陰送春擬韓致光

上海身未及作信知君已望我也  
到京住詒丈處解裝息力觀憲  
晚日復得靜觀詒丈以歡館近甚  
勤寫作伏案披此有伴劇務使人  
氣絕鄉中議以何園墨未至非園題  
目既斷截文極支離昨得師函信知

四耕已往石陽趕得房侯有費多  
笑夢仲奮三詩幸不為他人見珠  
玉不生多驗蓋信眼中皆魁父  
山牛涔之水免其涸者甚不易也  
未京師主意不言詩恨未能盡  
默鄉人遠尊松寥近版馬徑士為

人驚怪謂在外口而左閩川士可  
笑有一種情形之為眾適往來  
見其人深閉固拒稍窺謂已得其  
長短相視含咀而議之至於謂高  
詩乃鄉風不願與外人共作外人  
著作終不取看其命意甚不可解

凡事皆此類

詔丈痛罵之頗致疏怨吾輩誠

不可舍已從人今何至拘封以此微字

情未能免鄉風云中其法燮鉤珠有永平

時名人氣象惠亭今年定來否

負待寄還用意寫景庶可相視

而笑有疑為是下過占身分者未  
知我友之賢也王幼道以詞號召詩  
鍾極盛為詩者獨少壇坫寂寞  
久矣微字甚用心且夫似尚未深欲  
求一任譏彈者竟不可得此信多抵  
觸由今外人見詩附後

拔可題下

九月廿日

旭有

客還孤陋少情親  
厚我猶夸李與陳  
絕羨殺雞人有母  
謗呼作秦孰為賓  
欲言已盡原堪去  
相見方秋更待春  
路曲樹陰壓清泚  
記同詩客訪經神

奮拔可同鑒地

少年為道欲安心莫以端居  
擬陸沈叢桂小山真可好住白  
華庵子孰能侵書聲課弟  
燈初上竹影闌門雨自深新為  
高些作寂寞倚梧欠我夜分吟

拔可至鑒

旭錄寄



託珍年帶回一信計早收到到京忽二十  
日矣兩淮捐案未到不能入署擬入張菊生  
西學堂以會試在即不果一假却未嘗上  
目字略寫而已次文攀愛相依甚為無惟  
槐憲晚日靜趣殊多多步出門同人止不辨真  
數日來膝灣告警朝議勢甚瓜分在即  
矣康長素適來日有是非欲避之未能深  
愧吾友閉門之賢家叔常晤否到京寄

兩信未見來書淮北亦無一語上海聞  
甚熱鬧未報福州暢銷各回銷報又  
有與鄉人有話說好事之咎也若下年  
底出赴浙各伯義屋已與說定仲奮  
必需賠未作信在道意又點潤清抄  
數首將以夸王御史不必苦又點認其不  
欲賠面而還勿吝精墨惟侍奉多福  
不盡 拔可夢下池步十月朔

曹君小照前留在尊處想必收好  
千萬記著帶去未到要至酒此  
已成廣陵散矣以忽記起亦偶然  
拔兄名下 旭有

曹君卽曹夢蘭後改稱爲賽金花晚翠軒集中  
如和友人韻與石遺大興里飲罷過宿有數二  
首卽爲此人而作殆所謂本事詩歟墨巢識

晚翠軒集附錄

晚翠軒遺札題詞

余嘗言吾鄉年少之子文字蒼然成就者若吾礪谷者  
古今殆罕其匹礪谷喜暱就余有作必商量邃密顧往  
往相隔千數百里則筆札代喉舌用長箋短簡積余所  
者無慮高可盈尺被難後余翻舊篋輒心痛不能諦視  
拔可於礪谷妻黨晚一輩行然兩人齒相若皆早歌鹿  
鳴友愛如弟昆又同客沈濤園許有年此其平日書札  
拔可襲藏久之乃裝潢成卷以余篤愛礪谷必有親切  
可述者余於礪谷既忍痛作傳再敘其詩平日贈詩尤

數數矣。噉谷於詩歌駢體文外，並工四書文。殿體書見者，謂其書酷似吾鄉林殿撰鴻年。殿撰書非甚高，然學蓋數十年。觀此卷，益歎噉谷無往而不少。年老成，使人惜死於無窮也。

癸亥花朝，石遺老人陳衍記於上海寓廬。

談笑臨刑信大難。道傍萬衆總汎瀾。書生自詡君恩重，  
廿載頭顱七印官。

樓東詩老暗迴腸。客慧空花似太狂。晚翠軒中人去早，  
軒名端合與孤孀。

戊戌八月，哭噉谷詩。噉谷室乃沈濤園之女。

公子能詩詞晚而自號崦樓天下哀之拔可  
與礪谷最密見示此卷壬戌冬鄭孝胥

殺士之朝跡已陳鳳姿曾列眼中人此才頗繫興亡史  
魂氣留痕泣送春

卷中有效韓致  
光體送春二律

拔可寄示晚翠軒遺墨展誦黯然綴一絕歸  
之乙亥中春八十三叟陳三立時客故都

月轉觚棱直禁闌寒生曉夢竟同歸交情原自無生死  
朝局何緣較是非趙蓋沉寃從此熾伍文定論到今稀  
墨巢護惜雙魚素不共金莖露脚飛

楊鍾羲

林李昔齊名望若鸞鳳翔晚翠失交臂耳熟情殊詳

與子

晚翠同出王季師門下晚翠嘗欲觀子同試賦草未果遂竟不相覿其後沈敬裕公及林子霜杰爲子談君言

行甚

惜哉櫻世難世亦悲滄桑得失付千秋箋墨餘百

行李侯重遺跡隨處加護藏舊交骨肉恩字字皆芬香  
已自齊生死遂更忘短長嗟君古風誼迺根真肺腸我  
亦有所感掩卷神徬徨白頭彌篤故此德今人涼

何振岱

師丹老多忘爛柯換人世當時對奕人夢痕如水逝憶  
昔訪竹林子年纔十四讀書目十行頭角自矜異締婚  
得高門從師問奇字甥館居三年江山助文思一鳴竟

驚人遂應春官試意園人中師海內名流至後起數多  
賢觀槿與晚翠子暫鍛羽歸我忝青雲致科名信有天  
迴翔寧無地入作紫薇郎賓榻爲安置弄筆對槐窗學  
顏爭坐位同看長安花時閱海王肆偶復集詩朋間亦  
臨酒次此會豈尋常未許失交臂無何新學興變法以  
圖治欲避子未能我獨持異議因此坐疏遠非敢矜子  
智或謂近離間年少不更事或謂一己私借天下公義  
拂衣出國門擬附扶桑使戊戌政變中惟子實憔悴忽  
蒙特達知密贊金鸞記上書日萬言重觸當路忌鉤黨  
無是非殺士天胡醉東市收子尸一棺移蕭寺魂魄悵



何之代僵徒罕譬

八月十四夕降此有李代挑僵語

崦樓以身殉聞之

尤酸鼻合葬閩山陽歌哭見風誼觀槿子神交頗有闡  
幽意耆舊徧徵題苦語皆真摯春色作此詩痛心不遑  
寐遺恨卅八年掩卷餘涕淚

林開暮

子嘗稱晚翠佳句誦在口不死無以進此評孰能否遺  
牋付裝背知子隱痛久公案三十年因果愈紛糾僻塗  
士自噬枉命歸駢首至今論國是清議翻負咎黨事始  
甘陵補袞忠何有譬唐八司馬吾尤惜劉柳

夏敬觀

六月南荷池平生盡此觴

戊戌六月予將出都方囑霞錢於南荷池酒半晚翠忽偕

詒書聞然至訝其甫南歸何過墟炊一熟注海淚千行遽北來不意此晤遂成永隔

蹈刃終何補彌天遂永藏未須論殄瘁吾自痛人亡

詩是君能事堂堂晚翠軒遺珠搜不盡墜羽緝猶存異

代餘膠漆零香護芷蓀劇憐飛動意詞翰與招魂

吳用威

宋人委謗福建子風氣褊褻辱則宜文忠文肅稍振起  
假手功名仍衆疑夙傳晚翠略細行孤忠臨難無苟虧  
讀書種斷世所惜風烈照國寧阿私同時兩鳥比韓孟  
失羣一鳥居江湄受塵老去作書賈吳霜濯鬢殊未衰

卅年發篋札好在問學志節從可窺林詩經自誠齋出  
婉約似得冬郎遺君能廉劄法介甫早識摩壘无偏師  
今春我拜蓮池塔世難最喻栖栖詞宣南樂事久非故  
展卷錄夢生千悲淒涼甚血濺柴市何異抉目吳門時  
飲冰逝去亦八載師友零落傷交期騷魂國命有同盡  
終信南士非夸毗

黃 潛

晚翠學早成豈獨擅書翰作詩似王令齒弱語殊悍名  
高謗易集事去頭可斷唯餘一卷詩誰敢加點竄使能  
極所詣意恐光宣冠方君野狐精我則不鳴雁記君援

琴日我髮甫勝髴側聞殺朝士已發憂時歎卅年幾棋  
局每變輒召亂逃虛與醫國吾念雜氷炭石交餘一友  
寧以生死判斷斷表芳潔篋底收斷爛裝成比瓊寶不  
作耳目玩風義非所矜興亡此堪案

梁鵠志

郎曹執戟憶吾師文酒公車數見之嘗說解元

京卿癸巳年領

解年甫

稱後進

吳彥復主政師嘗述京師舊事

勞謙蒙難總堪疑

往事誰歌千里草

用京卿詩語謂董軍門福祥也後數年余游隴上董公已歿聞其忠貞醇

篤善教子孫語曰關西出將有明徵矣

懷忠竟失九方歎惟餘同學墨巢

子輯綴遺文費苦辛

老聃尙後始無殃競拔螯弧必有傷獨惜斯人策不用  
果兼才學識三長

天道五稔必來復良醫治國無緩商庸碌固位亦何補  
膏肓藥石眞非常

癸卯夏相國榮祿患內熱醫進石膏二兩逝

陳詩

藉甚當時黨錮名稍從遺札見生平清流一網東朝敕  
竊國他年北府兵誰信同歸傷白首端因前席問蒼生  
樵南風義今無比卅載仍吞欲絕聲

陳祖壬

林侯維閩英窈窕世未窺誰憐一網盡殺之如奕棋詩

句妙九州斑斑被諸兒豈如不見收秣馬興言歸翰墨  
化糟粕載行欲安之明明故人心要與斗牛垂非關自  
取重天下無相知滔滔今如此風雨思齊詩

集山谷集外詩句題晚翠遺墨袁思亮

朝衣往事已千秋塞艾依然涕泗流鬼躁任渠成穢史  
陸沉至竟了神州不教故紙生蟬盡別作虛名死豹留  
年少朱顏今幾在斜街回夢屋西頭

冒廣生

未容折檻辨斷斷痛惜朝衣委路塵健僕尙能助收骨  
遺孺何處暗傷神不甘黨籍言猶在欲報君恩志未伸

死去自留天下議論詩吾亦要斯人

李宣龔

孤生寡所歡往往歎氣類寧知哭死眼遽乃及晚翠平時略細行未盡可人意遂令盡命日四海謗猶沸丘山挽不前毫末豈所計狂藥眩舉國覺痛旋復醉改弦非爾力構釁但取忌肝腦所不吝天日有無貳願或引之去感語動涕泗小臣自愚闇君難安可棄衣冠赴東市嫉惡猶裂眦似憐黃鳥章臨終徒惴惴吾子有今日夙願百已遂當賀更以弔自反覺無謂願收聲徹天願忍徹泉淚敢以朋友私辱君死君義寒風今九月歸骨滯

郊次孤潒泣淮水大阮愴山寺忽聞潒兒歌恐傷侍中  
志行當謀速朽種梓待成器

右戊戌哀晚翠一首并附於后李宣龔